


TEZAUUR LITURGIC
24 SEPTEMBRIE

ACATISTUL
SF. CUVIOS-MUCENIC
GALACTION
DE LA
VOLOGDA



MOSCOVA, 2000



Акафист

святому преподобномученику

Галактиону, Вологодскому

чудотворцу

Кондак 1

Избранный от княжескаго рода и призванный в иночество скорбьми многими, угодниче Божий преподобномучениче Галактионе, в песнях восхваляем тя с любовью, небеснаго предстателя и заступника нашего; ты же, отче, яко имеяй дерзновение ко Пресвятей Троице, молися выну о спасении нас грешных и от всяких бед свободдай чтущих святую память твою, да зовем ти: Радуйся, преподобномучениче Галактионе, великий чудотворче.

Икос 1

Ангелов Творец и всего мира Создатель, провидев, яко сосуд избран имаши быти Божия благодати, отче Галактионе, от юности твоея

многими скорбями воспита ты в подвижника
совершенна о Христе, сильного словом и делом
пред Богом и человеки, нас же подвизает пети
тебе:

Радуйся, благородных родителей сыне;

Радуйся, княжескаго рода святое прозябение.

Радуйся, в отрочестве от смерти напрасныя
Богом сохраненный;

Радуйся, град отечествия твоего оставивый.

Радуйся, праведно и непорочно на земли
поживый;

Радуйся, гражданство Иерусалима Небеснаго
улучивый.

Радуйся, преподобно-мучениче Галактионе,
великий чудотворче.

Кондак 2

Видев кончину страдальческую родителя
твоего и врагов лютость, искавших твоея
погибели, отче Галактионе, ты же, подражая
Христу, в младенчестве Своем бегавшему от
гнева Иродова, избежал еси смерти горькия,
благодарственно взывая ко Господу: Аллилуиа.

Икос 2

Разумев добре непостоянство благ мира сего прелестнаго, Галактионе богомудре, чести и славы и богатства уклонился еси и яко един от нищих во град Вологду пришел еси, в нем же пребывая, от труда рук своих не токмо сам питался еси, но и нищих снабдевал еси; о сем тя хвалим и зовем:

Радуйся, кроткий Иисусов последователю;

Радуйся, смиренный Христов подражателю.

Радуйся, трудами праведными питавайся;

Радуйся, праздность душевредную возненавидевый.

Радуйся, нищих питателю;

Радуйся, убогих благодетелю.

Радуйся, преподобномучениче Галактионе, великий чудотворче.

Кондак 3

Сила Божия в немощи твоей совершашеся, Галактионе преблаженне, егда благий ярем Христов на ся возложил еси и, веригами железными стягнув тело твое, в затвор тесный

себе заключил еси, в молитвах непрестанных пребывая и выну вопия ко Господу: Аллилуиа.

Икос 3

Имел еси помысл чист и непорочную душу, отче преподобне, и ангелоподобное житие на земли проходил еси, смиряя плоть твою подвигами великими; темже яко воистину ангела земнаго и человека небеснаго тя ублажаем и глаголем:

Радуйся, ангельскаго образа усердно возжелавый;

Радуйся, в схиму святую облеченный.

Радуйся, мечем молитвы непрестанно вооруженный;

Радуйся, воине Христов непобедимый.

Радуйся, вместо доспехов ратных веригами железными обложенный:

Радуйся, вся искушения диавольская победивый.

Радуйся, преподобномучениче Галактионе, великий чудотворче.

Кондак 4

Буря страстей не потопи корабля души твоея, Галактионе преблаженне, но веянием Святаго Духа направляем, в тихое пристанище безстрастия вшел еси и, безмолвное житие в затворе много лет препровождая, непрестанно воспевал еси Пресвятей Троице: Аллилуиа.

Икос 4

Слышавше прозорливья твоя глаголы, отче преподобне, жители града Вологды о скорогрядущем на них гневе Божиим, познаша тя, предстателя усерднаго за них ко Господу, и потщашася покаянием очистити себе от скверн греховных, тебе же, яко покаяния проповеднику, возглашаху сицевая:

Радуйся, яко Иона, покаяние согражданом твоим проповедавый;

Радуйся, яко Иеремия, о разорении града Вологды горце рыдавый.

Радуйся, древним пророком равночестный;

Радуйся, будущая яко настоящая провидевый.

Радуйся, возшедый на высоту совершенства духовнаго;

Радуйся, рабе Христов, верность Ему до конца сохранивый.

Радуйся, преподобномучениче Галактионе, великий чудотворче.

Кондак 5

Боготечно, яко звезда путеводная, шествовал еси, преподобне отче, и примером жития твоего святаго многих ко Христу привел еси, ныне же всю страну Вологодскую благодатно озаряеши многими чудесы твоими. Не престай умоляти за ны Господа, о еже сподобитися и нам вкупе с тобою пети Ему: Аллилуиа.

Икос 5

Видевше исполнение пророческих твоих глаголов, дивно сбывшихся в разорении града Вологды от литовцев, сограждане твои, отче Галактионе, благоговейно воспоминаху твоя увещательная к ним словеса, ими же тщался еси привести их к покаянию, посту и молитве, в умилоствление праведно движимаго на них гнева Божия, темже и взываху тебе:

Радуйся, молитвенниче ко Господу за люди согрешившия;

Радуйся, провозвестниче воли Божией человеком.

Радуйся, дивный провидче судеб Господних неисповедимых;

Радуйся, усердный рачителю благолепия храмов Божиих.

Радуйся, строение обители иноческия на месте подвигов твоих предсказавый;

Радуйся, клеветы напрасныя и посмеяние кротце претерпевый.

Радуйся, преподобномучениче Галактионе, великий чудотворче.

Кондак 6

Проповедник был еси покаяния людем Вологодским, Галактионе блаженне, и страстотерпец добрый, положивый душу твою за град и люди единоверныя, убиен быв от злонравных литовцев, яко агнец незлобивый, и ныне во обителях райских светло ликуеши, вопия Богу: Аллилуиа.

Икос 6

Возсиял еси зарею многих чудес,
преподобномучениче, и от раки твоея честныя
благодатныя исцеления точиши всем, с верою
приходящим; молим тя, угодниче Божий,
уврачуй данною ти свыше благодатию и наши
недуги душевныя и телесныя, да зовем ти:

Радуйся, стратотерпче добропобедный,
биение лютое от литовцев претерпевый;

Радуйся, кровию твоею землю обагривый.

Радуйся, по триех днех страдания телеснаго
душу твою в руке Божии предавый;

Радуйся, на месте подвигов твоих честно
погребенный.

Радуйся, вериги твоя и гроб твой
цельбоносны явивый;

Радуйся, радости скорбящим подателю.

Радуйся, преподобномучениче Галактионе,
великий чудотворче.

Кондак 7

Хотящим нам молитвы принести ко Господу,
буди нам споспешник добрый, отче Галактионе,
и яко же при жизни твоей, бездождию бывшу во

граде Вологде, по молению архиерея и всего народа молитвою твоею дождь обилен у Господа испросил еси; тако и ныне проси нам милости у Всещедраго Владыки Христа, да благодарственно поем Ему: Аллилуиа.

Икос 7

Дивно бысть житие твое подвижническое и многострадальное, преподобне отче наш Галактионе, дивны суть и чудеса твоя, имиже прослави тя Господь по смерти, о них же недоумевающе благохвалити тя по достоянию, смиренно приносим ти глаголы сия:

Радуйся, страны Вологодския Богом дарованный покровителю;

Радуйся, правило преподобнаго иноческаго жития.

Радуйся, молитв благоприятное кадило;

Радуйся, бездождие молитвами разрешивый.

Радуйся, дождь обилен и благорастворение воздуха у Господа испросивый;

Радуйся, святыя обители твоя благолепное украшение.

Радуйся, преподобномучениче Галактионе,
великий чудотворче.

Кондак 8

Странно есть видети, преподобне, яко вода от
кладезя, рукама твоима ископаннаго,
недужными с верою приемлемая, целительна
бывает. Молим тя, угодниче Божий, и нас,
жаждою духовною палимых, напой водою
Божия благодати, да принесем Владыце нашему
плоды добрых дел и сподобимся благоприятно
пети Ему: Аллилуиа.

Икос 8

Весь любовью Божественною преисполнен
быв, Галактионе досточудне, ближних твоих
искренно любил еси и усердно им благотворил
еси, каковую же любовь твою к людям, ти
сродным, и по смерти являти не престаеши,
подвизая ны пети тебе:

Радуйся, на высоту совершенства о Христе
восшедый;

Радуйся, мужу желаний духовных.

Радуйся, сияющий, яко солнце, в Царствии
Небеснем;

Радуйся, мрак страстей разгоняющий в нас святыми твоими молитвами.

Радуйся, ведый нас невидимо на стезю благоугождения;

Радуйся, реко исцелений благодатных.

Радуйся, преподобномучениче Галактионе, великий чудотворче.

Кондак 9

Вси ангели Божии и святых лица восприяша ты с любовью в сожитие райское, страстотерпче преподобне, егда биенный люте от нечестивых литовцев дух твой испустил еси и Сам Творец ангелов венцем славы небесныя увенча ты, Ему же помолися, преподобномучениче, да и нас смиренных не лишит Он наследия Царства Небеснаго и пения Ему со святыми: Аллилуиа.

Икос 9

Ветии суесловнии, глаголавшии на ты стропотная и прекословная, преподобне отче, по неложному предсказанию твоему, посрамишася и погибоша, ты же радостно пребываеши со святыми и память твоя чествуется с похвалами до днесь, на месте же подвигов твоих обитель иноческая красуется, яко же предрекл еси, и

благоукрашенные храмы Божии стоят, в них же славословие Божие совершается, тебе же приносятся хвалебные песни сицевыя:

Радуйся, горняго мира украшение;

Радуйся, дольняго мира заступление.

Радуйся, иноков славо и похвало;

Радуйся, постников удобрение.

Радуйся, крове твоея изливанием град Вологду освятивый;

Радуйся, неверныя знаменьями грозными устрашай.

Радуйся, преподобномучениче Галактионе, великий чудотворче.

Кондак 10

Спастися всем нам помолися, преподобне, и не престай ходатайствовати за нас пред Престолом Пресвятыя Троицы, яко имый дерзновение к Триипостасному Владыце; молимся тебе прилежно, помози нам грешным странствие земное благочестно скончати и во славе Царствия Христова вечно пети Богу нашему: Аллилуиа.

Икос 10

Стеною молитв твоих небесных град Вологда ограждается и святая обитель твоя нерушимо пребывает, вси же, чтущии тя, у гроба твоего утешение получают, Галактионе многострадальне, темже приемлюще от тебе множество даров Божия благодати, благодарственно взываем:

Радуйся, милосердия Христова подражателю;

Радуйся, вечныя блаженныя жизни наследниче.

Радуйся, радости святых сопричастниче;

Радуйся, венца мученическаго сподобивыйся.

Радуйся, благодати Божия таинниче;

Радуйся, Пресвятыя Троицы верный исповедниче.

Радуйся, преподобномучениче Галактионе, великий чудотворче.

Кондак 11

Пение ангельское слышиши и доброту райскую созерцаеши, преподобне отче Галактионе, отнудуже и наше пение смиренное услыши, прося нам свыше у Господа великия и

богатыя Его милости, да присно благодарим тя, предстателя нашего, и вопием Богу: Аллилуиа.

Икос 11

Светлыми лучами чудес сияеши, Галактионе богоносне, и ими выну озаряеши души верных, с усердием и любовью приходящих к цельбоносному твоему гробу; не мним бо тя мертва суца, но жива о Христе, внемлюща гласом нашим хвалебным и вопиющим таковая:

Радуйся, святче Божий, со святыми почиваяй;

Радуйся, избранниче Христов, земнородныя благоутробно посещаяй.

Радуйся, по успении твоём чудесы многими святость твою показавый;

Радуйся, от гроба твоего струи целебныя источивый.

Радуйся, различныя болезни исцелеваяй;

Радуйся, во всяких бедах скорый помощниче.

Радуйся, преподобномучениче Галактионе, великий чудотворче.

Кондак 12

Благодать, данную ти от Бога, врачевати недуги душевныя и телесныя прославляем, отче Галактионе; не забуди нас, усердно призывающих тя, во время тяжких обстояний и в час смерти нашея не остави нас молитвами твоими, да в радости вопием Богу: Аллилуиа.

Икос 12

Восхваляем великия твоя подвиги, ублажаем мученическую кончину твою, святе Галактионе, и с несомненною верою припадая к цельбоносному гробу твоему, величающе тя зовем:

Радуйся, Пресвятая Живоначальная Троицы великий угодниче;

Радуйся, Пресвятая Владычицы Богородицы изрядный слуго.

Радуйся, ангельских ликов собеседниче;

Радуйся, всех святых сожителю.

Радуйся, свеще, в молитвах к Богу возженная;

Радуйся, душ наших к Царствию Горнему руководителю.

Радуйся, преподобномучениче Галактионе, великий чудотворче.

Кондак 13

О пречудне и богоносне отче наш Галактионе, заступниче наш теплый и молитвенниче непрестанный. Приими от нас милостиво малое сие моление и сохрани всех нас от враг видимых и невидимых, от всякия скорби, напрасныя смерти и будущия муки; да сподобимся с тобою и со всеми святыми воспевати Богу: Аллилуиа.

(Этот кондак читается трижды, затем икос 1 и кондак 1)

Молитва

Преподобне и богоблаженне отче наш Галактионе, крепкое страны нашея ограждение, христиан православных поборниче и теплый за нас грешных ко Всемилостивому Богу нашему Иисусу Христу и Пречистой Матери Его, Владычице нашей Богородице и Приснодеве Марии молитвенниче. Умиленно молимся тебе, преподобне, не забуди нас грешных и недостойных раб твоих, но яко заступник и ходатай усердный, призри милостивно на немощь нашу и испроси молитвами твоими у

Христа Бога нашего, да освятит благодатию Своею души и телеса наша, ум наш просветит светом богопознания, совесть нашу от мертвых дел да очистит, от греховных помышлений и губительного уныния да оградит, и дарует нам искреннее покаяние, сердце сокрушение, слезное умиление, воздержание и трезвость, смиренномудрие и кротость, чистоту душевную и телесную, нищелюбие и страннолюбие, и друг ко другу нелицемерную любовь. О всеблаженне отче Галактионе, сподоби нас шествовати путем спасения, да твоими молитвами преблагий Христос Бог наш покажет на нас, грешных, благодать и милость Свою, и всяческих зол и будущего мучения нас свободит, и сподобит наследники быти Царствия Своего Небеснаго славящих и величающих Его купно со Безначальным Его Отцем и Пресвятым и Благим и Животворящим Его Духом, ныне и присно, и во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**